

四庫全書

史部

欽定四庫全書

三朝北盟會編卷三十二

宋 徐夢莘 撰

靖康中帙

起靖康元年正月二十五日辛卯盡三十日丙
申

二十五日辛卯廊延張俊韓時中涇原環慶馬千等皆
至京師稍安斬內侍官匿金字牌者三人 初朝廷發

金字牌徵兵隴西內侍官暗留不遣及馬千等至皆云不見金字牌但云聞京城危急來赴難由是發覺故斬之二十七日癸巳真定府路安撫使劉韜送馬擴下獄茅齊自叙曰先是被童貫之命招置真定中山忠勇敢戰軍馬專一統御擴急趨保州取家屬南歸復過中山見烽火連舉五把次日至真定劉韜委擴提舉四壁守禦靖康元年五月七日拜上登極赦擴密遣人入京具畫一奏劉具說金兵南下步騎無二萬人又時已春首彼

難久留乞堅守京城不輕出兵括取官私馬無慮三萬
足召募敢勇必戰之人各授器甲略閱隊伍每五千人
為一鎮分屯要害密檄諸道勤王之兵併力齊進預戒
河東河北多設邀截彼不過二月中必退京師之兵躡
其後河外之兵邀其前彼方阻河勢迫乘機擊之可使
足馬不回後因職事與韜之子新授浙西市舶提舉子
羽議論失歡子羽乃與路分鈐轄李質等同謀譖害之
癸巳擴晨往謁韜坐未定韜密備兵卒在庭呵擴下曰

爾安得反可斬之擴大呼曰時事如此方用人之際豈可聽小兒子譖誣欲害士大夫乎鋐曰不干渠事擴大曰擴與令嗣提舉不足衆人共知何謂不干渠事且公欲斬人亦湏責文狀否鋐辭曲不復言斬乃曰送之有司遂置擴于獄中子羽作奏劾誣以約金人獻城事二月得旨令提刑司置院根勘具的確情犯聞奏 同日降指揮為醵大金金帛未足權行拮括 聖旨朝廷近為大金攻圍京國方講和議須藉金銀幣帛數目金銀最

為緊急雖各分定拋認之數尚慮告論一節或為民
害遂令除去下令已來權豪殊不體念國家之急所納
之數金全稀少可自今月十七日為始應京城畜金之
家所有之數或以埋藏或以寄附限兩日盡數赴元豐
庫大觀庫左藏庫權貨市易務都茶場送納金每兩價
錢二十貫銀每兩一貫五百文先次出給憑由公據候
事定支還若限滿不赴官送納並許詣色人告陳于金
銀內二分一分充賞犯人取旨重刑斷遣知情不告與

同罪除開封府見于豪民之家分認數目送納外餘逐
色目逐家已行科定金銀數目指揮吏示施行尚書省劄
于殿中侍御史李奉議奏臣等伏惟近降聖旨借士庶
金銀如納數多當議量度于武官內安排特與選限不
礙正法理為官戶注授優便差遣臣等訪聞民間供輸
今已累日其納數多可應前項指揮者臣等欲望聖慈
付有司條具以聞遂授以官非特示民以信亦可激勸
來者其或有願田舍乞以近拘收到房廊物業量價給

還庶使人心懽悅樂于輸納以濟一時之急謹錄奏聞
狀望聖旨依奏是日晚專領收簇大金犒賞金銀所據
左倉庫中有廣福坊李隸已納金六百七十四兩銀一
萬四千七百四兩九錢葛關金六百兩銀三千五百七
兩奉御寶批李隸與成中郎葛關與保義郎凡進納皆
與百戶以勸來者 李綱與李邦彥吳敏種師道姚平
仲折彥質同對于福寧殿議用兵 傳信錄曰是日同
執政上殿議所以用兵者綱奏上曰金人兵張大其勢

然得其寔數不過六萬人又大半皆奚契丹渤海舊卒
其精兵不過三萬人吾勤王之師集城下二十餘萬固
已數倍之矣彼以孤軍入重地正猶虎豹自投檻穽中
當以計取之不可與角一旦之力為今之策莫若扼河
津絕糧道禁抄掠分兵以復畿北諸邑俟彼遊騎出則
擊之以重兵臨敵營堅壁勿戰如周亞夫所以困七國
者俟其芻糧乏人馬疲然後將師檄取誓書須三鎮縱
其歸半渡而後擊之此必勝之計也上意深以為然

二十八日甲午种師道使姚平仲進兵逼其壘敵不敢動南歸錄曰种師道以四鎮不可割與李邦彥議人異同唯李綱議與師道合師道問沈瑄金人初來事瑄對曰河瀕若有千人兵守之金人豈至都城師道曰不然金人至此如何却去又問瑄河北地形及邀截之狀瑄對如上李右丞書同師道曰如公之言比至塞上無匹馬矣瑄復問師道曰今日如何處置師道曰公見得敵寨中有糧否瑄曰金人沿路日掠糧草今至城外

取金帛女子未有聚糧之意但恐聞西兵至方旋聚糧
想必不多師道云如公之說昨日生擒二賊割腹視之
食已黑豆今當逼賊營劄六七大寨以守把抄掠路不
過五七日間彼自折沮矣瑄又出一劄子呈師道曰金
國長驅直犯京闕蓋緣中國失謀今日之謀豈可再失
哉執政大臣力主講和之議然金帛果充其數乎三路
之地果能棄乎已議講和而王畿之內剽掠殆盡兵回
之後果能保其不攻掠城邑乎大抵姦人借宗廟社稷

之重以勸人主而為全身之計或張大金人之勢以脅朝廷而成其講和之功殊不思異時之患人有甚于今日也聞金人見造浮橋馳驛班師若遷延失機瀋州橋既成尼堪之兵繼至將有噬臍之悔矣兵貴速拙不貴巧遲伏望宣撫樞密使詳酌斯言斷以不疑而早圖之宗社幸甚 監察御史余應求上書乞將相勿爭私忿早定和戰之計書曰臣嘗讀六月之詩有曰文武吉甫萬邦為憲又有曰侯誰在矣張仲孝友蓋宣王既使文武

之將征伐于外矣若內無孝友之臣以與王居則纔言
日至忠謀不見用雖有吉甫焉能成其功哉至唐穆宗
則不然裴度以元臣宿望出討幽鎮烏重嗣李光顏皆
一時名將勢若易而元稹用事恐度有功妨已進取所
畫軍事皆從中阻壞之故屯守踰年迄無成功夫內外
之事相須如此可不監哉方今強鄰入境四郊多壘講
和之計雖決而金帛之數未足兵將之勢已振而師出
之日無期是宜內外之臣同心一意共議國事以雪恥

辱之時也而道路藉藉皆言宰相大臣與將帥異謀朝夕喧爭未有定論審如此豈誠心為國者哉夫和親征戰之說漢廷臣論之詳矣今日之策未可偏廢然金帛既不足金人必不肯退師又三鎮三關之地向以兵力寡弱不得不姑從之今諸將援師繼至而城下要盟神弗信也若金人必要金帛之足與三鎮三關之地又豈得憚于用兵哉陛下既以兵事委李綱與諸將矣願詔執政大臣以孝友張仲為心和以濟事無爭私忿先公

而後私庶幾大功可立如或不悛與夫妨功害能之人
當顯黜之求所謂孝友者而任之可乎雖然戎馬在郊
城門未啟中外不通已再旬矣和戰之計亦宜早定願
詔宰執將帥僉議黼坐之前使將帥出師與之對壘然
後遣辨士以利害禍福成敗屈直與之言若能休兵講
和以繼好息民策之上者苟貪婪而無厭旅拒而不受
陛下雖欲勿戰得乎人況事直師壯人有關心以宗廟
社稷之靈何憂不克所可慮者窮寇遠來自居死地困

獸猶闕之時也願更詔將帥持重應機無輕接敵以取
萬全之策不勝幸甚臣一介書生不知兵謀忠憤所激
欲默不能惟陛下裁擇

三十日丙申太學生陳東上書乞誅六賊 京師傳聞

太上皇到泗州蔡京童貫等建議留高俅以侍衛兵扼
泗州太上皇南去人心不安陳東乃詣登聞檢院上書
曰臣于去年十二月二十七日曾同本學諸生等伏闕
下上書言蔡京王黼童貫梁師成李邦彥朱勔等六賊

罪惡乞誅戮又于今月初六日獨詣登聞檢院上書言
京劬父子及贊等挾太上皇南去恐逸邏渡江假藉威
勢遂生變亂之禍乞追數賊復還闕各正典刑別選忠
信可委之人往侍上皇前後二書至今未蒙盡賜施行
雖聞王黼李邦彥已曾施行然罪大謫輕未厭公論京
劬父子釋而不問縱之南去師成尚在親密之地中外
疑懼臣竊謂朝廷方有軍旅之事未暇議此以故未敢
再有申陳然今日事勢之急殆有甚于敵國之兵皆羣

賊誤上皇所致今又挾上皇于危急之地臣豈敢尚爾
默默臣昨日聞道路之言曰高傑近收其兄佖伸等書
報言上皇初至南京不欲前邁復為數賊挾之而前沿
路切持無所不至上皇飲食起居不得自如數賊阻隔
甚嚴除其黨與之外不容他人輒得進見雖高佖被宣
欲進亦復艱之行至泗州又詐傳上皇御筆劄付高佖
只令在本州守禦浮橋不得南來挾上皇渡橋而南以
趨浙江其隨駕兵士盡為羣賊斥之而回聞方過橋之

時衛士攀望上皇車駕失聲號慟童貫遂令勝建親兵以弓射之衛士中矢自橋墜者凡百餘人高球兄弟在道傍徨得一望見上皇君臣相顧泣下意若有所言者而羣賊在其側上皇氣塞聲咽不敢輒發一語道路之人莫不扼腕流涕臣雖至愚粗知忠孝傳聞此事不覺涕淚流臆為陛下憤陛下父慈子孝天下所共知上皇今為天子之父而乃受制姦臣賊子一至于此可勝寒心此臣所以汲汲為陛下言之也蓋數賊之黨徧滿東南

而上皇隨行大臣如宇文粹中又是蔡京甥婿其弟虛
中聞亦竄而往蔡攸京之子也得守鎮江據千里山川
要害之地宋喚蔡攸之妻黨也出領大漕專數路金穀
歛散之權童貫有親隨勝健之精兵朱勔有同鄉附已
之衆惡皆平時陰結以為備者一旦南渡即恐振臂乘
勢竊發控持大江之險奄有沃壤之饒東南千里百郡
縣必非朝廷有是將傾陷陛下父子使之離間非特聖
孝之養阻奉晨昏而其事必有至難言者臣竊謂今日

之勢敵國非所患所可深患而齒之不可少緩者正在此耳陛下何尚不忍于此耶臣知之矣必是梁師成陰有營救致陛下未得奮發英斷臣請申言師成之惡臣每聞縉紳之言曰師成為人真是儉倭自其容貌觀之似不能言者而稽察其衷陰險禍賊最為可畏盜我儒名外示廉靜其寔招權怙勢侵我紀綱上皇每進用一宰相大臣以及侍從之官師成必收其功以歸諸已故宰相大臣秉持國政必惟師成之命是從王黼事之不

帝父兄蔡京父子趨事不暇師成氣馘傾聳朝路賢士
大夫莫敢側目至如文章之事責在詞臣朝廷典誥各
自有體師成必欲其文悉如已格一或背違輒行譖斥
國家取士至公之選無如科舉士大夫所持以自異者
無如及第出身人主所以籠絡天下英俊以求將相者
正在于此而師成乃薦其門吏使臣儲宏兩次特赴廷
試賜第唱名宏自登第之後依舊充使臣之役即是天
子臨軒策士止可充師成趨走執役之吏非特以左右

奴僕玷辱士類又所以輕侮朝廷選舉之法宣和六年
春上皇親策進士八百餘人聞其中百餘人皆以獻頌
上書為名特赴廷試卒多師成之力盡是富商豪子曾
進納及非從補授官職士大夫不齒之人或白身不足
應進士舉者聞每名獻錢七八千緡師成便為奏請特
赴廷試之命師成所為既衆即又傳令張補等將上其
它權倖遂相效以賈利師成寔啟之每遇賜名唱第之
日師成必在上側臨時奏請妄有升降以公道在廷之

士往往解體國家選舉之法為師成壞亂幾至掃地此
事縉紳士大夫上至朝廷人所共知第畏師成不敢言
耳師成平日受四方監司郡守以下餽賂不計其數又
創置北司聚不急之務專領書藝局濫建官吏賸立工
徒以進市井游手無賴之輩濫恩橫賜糜費百端京師
土木之工窮奢極侈往往師成實董其事因偷盜官錢
不知紀極不察其所為而惑其足恭詐偽必以為真能
廉靜者此所為以直濟佞以廉濟貪大妄似聖大詐似

忠者也臣又聞師成在內朝善觀上意所向隨向隨轉
每以性取之因緣為姦竊弄威福陰奪人主之柄正如
美酒好色浸淫害人而人嘗耽嗜無厭不覺遭其毒手
也臣恐師成今在陛下左右浸潤彌縫無所不至在陛
下離明獨照洞鑒其姦必不為其所惑然師成與貫結
為姻家京黼劬彥又其積年之朋黨盤根錯節牢不可
解師成不去同惡尚在深念陛下威福之柄未免竊弄
于此人之手羣賊等輩倚為奧援太上之心胡可得哉

數賊罪惡貫盈陛下素所備知不特待臣區區之說臣
前書所陳已可槩見臣更請以比日所聞為陛下言之
前此上皇傳位陛下蓋其聖志素定非臨時倉卒之謀
唯此數賊實常撓之而蔡京攸者沮遏猶力賴上皇聖
明獨斷志莫之奪贊襄之力吳敏有焉陛下謙遜之際
聞數賊密請鄆王楷來到殿上而師成實為謀始此意
安在比至事定自知失計乃爭言曰太上之志我實成
之吳敏之策我實授之定策之功我實有之人臣要君

莫此為甚天下共知數賊久欲不利于陛下方陛下在東宮時各懷異意欲伺間隙于是楊戩亦同其謀臣前書已盡言之矣又見比年都城婦女首飾衣服之上多以韻字為飾甚至男女衣著幣帛往往織成此字皆是師成唱為讖語以撼國本羣賊和之更相夸尚以動天下之心忠臣義士切齒刻骨非一日也迨今傳位之次復肆姦謀弗成乃欲貪天之功以為己力怙終陰慝有如此者又况蔡京久事上皇素有異志童貫蔡攸近與

金人結為內應欲分我中國而王之反狀敗露遂退逃
遁朱勔父子勢傾江浙已二十年矣今此數賊同挾上
皇而去亦恐素性勿悛未必肯利于上皇也萬一禍有
不測而梁師成復從中起陛下將何以處之願亟圖之
毋使滋蔓蔓難圖也竊以今日敵國恣行侵侮而我上
皇哀痛罪已至遜位而去凡厥左右大臣及親近用事
之人不問有罪無罪率皆引已歸咎自求貶放為君分
謗也豈有其君痛自罪已而一時巨臣偃然自若畧不

知悔則前日之事咎將誰執矧今外侮之釁實自羣賊
啟之不知陛下何憚不誅而縱其遠遁幸免耶或尚使
之出入禁闥而無所忌憚耶江浙之變蕭牆之禍不可
不慮陛下若欲正厥典刑當自梁師成始如不然則朝
廷之上動輒掣肘事未可旨也臣願陛下勿以臣布衣
之言為無足采者愚者千慮必有一得陛下姑試行之
仍願陛下速降德音往上皇行在告諭應隨行軍兵予以
厚賞使各悉心協力衛護上皇車駕亦乞亟命宰執恭

齋陛下親筆奏書往迎上皇早還京師庶使不負終身
欣然樂而忘天下之志陛下復遂父慈子孝之美以彰
孝治之盛天下幸甚臣為此書而或者見譙曰上方以
敵國為患子猶不能獻一謀策以為一計而乃汲汲于
前日之事毋乃不知先後緩急乎臣應之曰此乃不然
者敵國之患止于手足羣賊之患寔為腹心腹心疾去
元首自全手足浮痾豈能為患今敵人所欲大則土疆小
則玉帛玉帛相通自古有之祖宗土疆得之甚難寧忍

棄之一旦縱敵數世之患寧不鑒之城下之盟不足守也豈不知之千里襲人未有不亡者也今敵襲我越數千里其亡必矣尚何疑之師克在和不在衆同心同德和之至矣廟堂之上帷幄之中將相大臣孰不知之陛下淵默雷聲乃赫斯怒奮發英武以殄仇讐又何難焉此在睿謨必有以處之矣如臣書生豈敢妄議臣書所陳必欲先誅六賊者係陛下父子天性之重宗社生靈莫大之計臣謂今日之事唯斷乃成當斷不斷反受

其亂幸陛下留神存續天威罪當萬死貶梁師成節
度副使安置差遣使臣日下押出門本處交割中興
遺史曰陳東疏奏未及施行會姚平仲之敗繼有歐擊
宦官大學生伏闕事再貶師成循州安置未行師成知
不免遂自殺梁師成字守道始以小璫親文墨得侍
上師成能任數且謹密主傳道上旨遂親信初佐賈詳
為書藝局詳死故師成專以奇巧始得君久之為睿思
殿文字外庫益用事矣政和間廼盛起艮嶽建明堂改

作宣德門時已陰主上文書遂行宰相事俾王黼在外
表裏之內為關決上每宿于外則即成入處殿中因于
文字外庫擇能文筆吏隸其下凡御筆號令批荅率命
其徒以自代後來宰臣執政至于侍從多其門生王黼
父事焉亦有望風而不獲進者其若害政敗國首為宗
主嘗自目為蘇軾之出子與軾諸子叙拜為兄弟行數
丐上曰先臣何罪大抵不揆凡若此其後淵聖皇帝即位
太上皇帝南幸羣姦懼為正人所圖乃留師成宮中以防

其內外則託李邦彥相與固天子意然師成卒得罪縊
殺之但以其自縊聞詔贈太師或謂坐太上嘗諭大臣
始內禪時師成獨沮異又以表裏王黼云別錄云貶彰
化軍節度副使行及八角鎮而死 張叔夜請兵邀擊
金人第二狀 右臣昨奉御前劄子女真前鋒至關及
覲赦文欲遣使和會臣嘗于正月二十七日奏以為若
許和會則金人必有邀求今若縱之使去後必復來遂
有輕中國之心乞遣騎邀擊及預令河北邊鎮出兵斷

其歸路臣乞候錢蓋到交割訖前去國門願假臣騎兵與諸將併力追襲未奉處分臣竊謂中原有警臣自合領本路兵及弓箭手等差守管押赴京畿外契勘臣昨于去年十月以京東盜賊盡靜蕩平班師後因病再乞宮祠伏望聖慈矜憐特與所乞差提舉崇福宮近者奏乞與諸將追襲敵兵出于愚衷以世受國恩于義當國家緩急之時所宜力疾自効不應端居養疴今來臣已自徐州南京拱州路前去國門聽候處分伏乞睿慈特

降處分如敵馬自今衝突即乞早假臣兵領詣尚書省
取稟前去如朝廷已別有施行處置無所用臣顧方陞
下即位之初臣予之情莫不願顧瞻清光兼臣有前任
京東安撫使本路急切利害然不敢輒乞朝見敷奏伏
乞特恩許臣到關引對奏陳訖或至于尚書省投納訖
前去潁昌府揚翟縣居住須至奏聞者右勘會臣已於
正月三十日當日離任起發前去伏望聖旨檢會前奏
早賜施行

三朝北盟會編卷三十二

欽定四庫全書

三朝北盟會編卷三十三

宋 徐夢莘 撰

靖康中帙

起靖康元年二月一日丁酉盡四日庚子

二月一日丁酉朔姚平仲劫金人寨不克敗績楊可勝
被執為斡里雅布所殺 中興遺史曰先是朝廷大臣皆
主和議唯李綱非之及种師道至議論與綱同上意頗

和又姚平仲以士不得速戰有怨言達于天聽又一日上遣使伍革促師道戰師道奏請召大臣熟議之君子謂師道主張不定其意在乎敗則分謗也乃與李邦彥李綱吳敏同對于福寧殿皆言可擊上問兵期師道請過春分節上以為緩乃密遣平仲及楊可勝等取二月丁酉出兵劫摩訶大寨可勝奏曰此行決危又恐失國家遣親王宰相和議之信臣欲作奏檢藏懷中具言臣不候聖旨往擊敵上許之是日也用術士楚天覺尅

擇劫寨之日漏語于數日之前都人戶戶知之又植三大旗于開寶寺皆書為御前報捷字仍于封丘門上張御幄以俟車駕臨受俘獲都人填隘于衢路顙待捷音平仲可勝等以兵七千出城金人空其寨伏鐵鷂子兵以掩官軍平仲等大敗可勝被執夜漏猶未盡上既聞其交鋒急詔李綱出援應接傾刻之間使者三至既拜命戊戌出景陽門至班荆館行營前軍統制張撝右軍統制石濬中軍統制辛康宗左軍統制劉佃後軍統制

王師古敢戰統制范瓊等悉出封丘門遇金人皆敗陳
福歿于陣中官軍披城歇泊己亥再戰又敗庚子開門
放官軍入城唯選鋒統制韓世忠先往應援東明縣獲
勝而韓里雅布得可勝而問之曰兩國已通和又來劫寨
何也可勝曰可勝以勤王兵到京師三軍欲戰故可勝
率之以來非朝廷之意也乃出懷中奏檢示之韓里雅布
怒遂殺可勝 中興姓氏忠義錄曰楊可勝陝西勇將
可世弟也大金薄京師自陝西領兵來勤王上與大金

講和密遣可勝以兵五千須刼其寨可勝奏曰此行決
危又恐失國家之信臣欲作奏檢藏懷中云臣不候聖
旨自往擊賊上許之時夜刼大金寨敗績被擒大金斡
里雅布問宋國與我和盟又刼寨何也欲併力攻城可勝
曰非主上意可勝自來戰爾斡里雅布不信可勝出懷中
奏檢示之乃信斡里雅布大怒而斬之世哀其忠 靖康
前錄曰姚平仲初一日刼寨之謀二十八日已遍傳于
都下至期出師將士不知所往平仲遣王通為先鋒驅

五百敢死士直抵敵營刼二寨皆空至第三寨敵已持滿執挺以待之前軍殊死戰援兵多溺于溝中西將陳開死之通回視其軍重傷已半敵騎自北而南夾攻其後通之衆並不敵棄弓矢以三百騎突圍而出見平仲急揮令上馬西竄敵已衝散其中軍追至板橋乃回二日戊戌韓里雅布奉書問刼寨兵馬書曰今月初一日夜五更時有步騎軍沁孟陽河東南二處向北奪橋詰朝又于大軍營西南刼陣前來當司量遣兵隨路禦逐

曾未踰時殺傷兵卒甚衆所獲器甲鞍馬其數多緣當
司不識是甚處兵及從何來願示其詳謹奉書奏聞謹
奏

朝廷報書 上遣宇文虛中往敵營報書曰大宋皇帝

致書于皇子郎君比者大金軍至京城方懷恐憂廼承
寬仁盡洗宿愆許修新好獲安社稷貽慶子孫恩義之
重實同天地前日王汭來審所持犀玉等盡蒙留納并
金銀等數亦從寬假尤荷恩義之重自非懽好之重何

以及此所諭前書所陳未盡明白謹依來悉從改易并交割三鎮詔書初二日方欲坐朝遣來使還一併持去忽報初一日夜有兵馬在城外作鬧本朝不知事因既聞輒至大金軍前不勝驚駭尋遣人根問指約至暮乃知是姚平仲統諸路軍兵作過尋令根捉稱本人未回軍寨亦見令人擒捕俟見即正典刑以戒貪功誤國之士又執政間有素與姚平仲相善其形迹可疑恐相協助已先行黜責了當且本朝自度事理其不敢輕舉妄

動者有三論彼此強弱之勢則本朝兵力寡薄難以迎敵一也前此敗盟煩大軍遠來逼近京城惴恐失措荷恩德再造豈敢復有負約之理二也宰相親王特遣詣軍前為質又遣執政大臣奉使事體亦重豈忍置而不恤有傷君臣之義骨肉之愛三也皇子郎君仗義而來聰明果敢必能察此方城外有亂兵所以當日未敢遣使人便還深愧遲滯尚冀深照其他一如誓書所載天寶臨之永永萬年因復敢渝今遣資正殿大學士宇文

虛中持書布叙并賫所授國書及三府詔書地圖等前去詳此洞照謹白宇文虛中為簽書樞密院事持報書使于幹里雅布軍前姚平仲等既敗乃除宇文虛中簽書密院事使于幹里雅布且言平仲等擅用兵甲幾誤和議因遣副使交割三關之地李稅沈晦路允迪秦檜程瑀奉交割之地姚平仲擊金人不利宰執亟議召李稅持國書割地以和并奉地圖沈晦奉誓書路允迪割太原秦檜割河間程瑀割中山李綱入對不得初李綱與金

人對壘士氣百倍而宰相會食中官俾奏奇兵劫寨敗
衄宰相乘之奏上前張皇敗勢以謂王師皆歿無可復
戰大事去矣日暮休兵宰相又奏危亡在即李綱入對
至閣門為中人所隔不能入晚聚都堂宰執等再奏堅
執和議師道曰勝負兵家之常正當再擊之耳何遽喪
氣乎宰執皆不聽

三日己亥大臣奏李綱种師道出師敗績可正典憲乞
罷綱等种師道罷為太乙宮使李綱罷行營使

傳信錄曰二十七日與李邦彥吳敏種師道姚平仲折彥質同對于福寧殿議所以用兵者余奏上曰金兵張大其勢然得其實數不過六萬人又大半皆奚契丹渤海舊卒其精兵不過三萬人吾勤王之師集城下二十餘萬固已數倍之矣以孤軍入重地正猶虎豹自投檻中當以計取之不可與角一旦之力為今之策莫若扼河津絕糧道禁抄掠分兵以復畿北諸邑俟彼遊騎出則擊之以重兵臨敵營堅壁勿戰如周亞夫所以困七

國者俟其芻糧乏人馬疲然後以將帥檄取誓書須三鎮縱其歸半渡而後擊之此必勝之計也上意深喜為然衆議亦允即分遣兵而朔二月六日舉事蓋陰陽家言是日利行師而姚古种師中之兵亦將至故也其約已定而姚平仲者古之子屢立戰功在政和間為童貫所抑未嘗朝見至是上以其驍勇召對內殿賜與甚厚許以成功當有節鉞茅土之賞平仲武人志得氣滿勇而寡謀謂大功可自有之先期于二月一日夜親率步

騎萬人以劫金人之寨欲生擒所謂韓里雅布者取康王以歸雖种師道宿城中弗知也余時以疾給假行營司夜半上使中使降親筆曰平仲已舉事決成大功卿可將行營司兵出封丘門為之應援余具劄子辭以疾且非素約兵不預備斯須之間中使三至責以軍令不得已力疾會中軍左右將士詰旦出封丘門勒兵于班荆館天駟監分命都將范瓊王師古等會敵騎出歿鏖戰于幕天陂斬獲甚衆復犯中軍余親率將士以神臂弓

射却之是夜宿于城外而平仲前一夕劫寨為敵所覺
察殺傷相當所折者不過十餘人既不得所欲恐以違
節制為師道所誅即遁去而宰相執臺諫閔然謂西兵勤
王之師及親征行營司皆為金人所戮無復存者上震
恐有詔不得進兵而韓穉雅布遣使以用兵特將士所為
不出上旨請再和宰相李邦彥于上前語使人曰用兵
乃大臣李綱與姚平仲結連非朝廷意簽議欲縛余以
與之而使人反以為不可遂罷余尚書右丞親征行營

使以蔡懋代之因廢行營使司職事以守禦使總兵事而种師道亦罷宣撫使于是時得止兵詔知事且變即振旅以入城詣崇政殿求對既至殿門聞罷命乃不過退處浴室院待罪初三日也尚書左丞蔡懋為行營使靖康遺錄曰李邦彥方主和議忌李綱主戰因其敗而中傷之遂與師道皆罷乃命蔡懋為行營使諸統制既回綱已罷矣蔡懋之為行營司也士卒令卸器甲保伍麾去不用方革去權閣提舉城壁如梁方平等又

盡復之始金人見邦彥除太宰軍中輕笑曰南朝果無人及綱師道主行營都統則堅壁不敢亂出一騎至是聞二人罷復縱數百人騎自北直東薄城下間以矢石中城上城上輒復者懋皆令笞之乃至請布囊數千它器稱是揚言利以貯金移寨而反資之以土囊塞河夜半有以內侍傳宣啟東門出者賴門吏反覆詰之不可而去皇城火禁並以軍法輒有紅燈籠置諸城上又城西北隅易建獨角皂旗其中飾以鴈非本朝軍中物人

騎觀之京師居民震恐慮有不測 靖康前錄曰是日以蔡懋領行營司乃邦彥等謀也人情恟恟殊不自安懋下令禁守禦兵不得放矢石范瓊馬忠披城割寨外餘兵盡退入城敵復大肆衆謂懋懷二心官有陰為內應者城中大恐敵焚北郊煙焰亘天乃以十餘騎誘官軍設軍伏于道左一步卒射之中其馬首敵遂引去

鄭望之押珠玉赴軍前回 鄭望之奉使錄曰先是二十一日宣召稅與望之對福寧殿上云國家無許多金

銀禁中却然有珠玉等卿等可通去商量以此准折有
一內官傳宣便令出門到寨中金人留孳生監三兩日
即移寨牟馳岡過孟陽河一二里不久王汭來云皇子
郎君已知樞密侍郎來傳語樞密侍郎緣打毬罷覺頭
痛畏風若別有事商量候晚間相見只為犒軍金銀此
已別差一番使人去更不須相見望之度不可見即語
王汭云國家委無許多金銀皇帝甚不足早來宣詔云
禁中有數世寶藏珠玉及象牙犀角欲以此准折王汭

云皇子郎君亦愛此等物前見高觀察所執笏借去看
極愛樞密侍郎如今歸去後可辦下所有珠玉等別做
一日便押取來須有商量回城中時申時後入對福寧
殿具奏前件語言上云豈非二太子先去了也連云是

是

望之初不測聖意後來聞得街人楚天覺曾奏云敵
分野大將星已遁又曾對李綱云可惜許走了助成

綱叔寨之計楚天覺深有力焉當時雖是傳聞後來見
綱目撰傳信錄曰本朔二月六日起事蓋陰陽家言是
日利行師而姚平仲先期于二
月一日舉兵以此知所傳皆實又云珠玉待盡盤在宣

和殿一齊將去二十九日宣詔宰執等同對福寧殿上

云珠玉照不少盡在宣和殿可同過去看自福寧殿西
廊下轉過宣和殿珠玉皆用籠匣盛放內官梁師成舉
起一玉盃外碾成螭龍行云此盃只碾作工價幾千緡
上云不知要做甚却過福寧殿令梁師成專管津搬赴
軍前令稅與望之同共管押前去二月一日同稅出城
其珠玉犀角象牙等盡在野地頓放太師耶律忠來相
見云皇子郎君今來交割稅袖中出數目劄子耶律忠
云樞密且坐只與侍郎去交割却到野地鋪褥地坐有

歸朝官六七員在彼逐旋擡過珠玉來耶律忠云皇子
郎君教逐件估出價錢望之云此皆希世之寶凡目所
未覩如何估得價利有一歸朝官向望之前附耳云估
價是好意侍郎高估價不妨望之遂逐件約貌高估價
錢通計價錢百萬緡耶律忠回笑云皇子郎君甚喜傳
與侍郎明日相見皇子郎君道少許多金銀却着這些
價錢準折待要做恩致是夜要四更多時劉都管高叫
云相公憑起你家人馬來廝殺也廳前大燒起柴火

明康王頗驚駭望之密曰若王師勝彼必不敢害我也
即若他勝大王在城外已半月日豈預知劫寨事政不

須恐康王
頗以為然

二日幹里雅布請康王及邦昌等相見帳前割

自家旗幟數百面俘擄到將校數十人再三詰責邦昌

云必不是朝廷如此恐是四方勤王之師各奮忠義自

相結集故來劫寨幹里雅布云待道是敵來怎生有許多

敵相公慙只可道朝廷不知也次日望之入城具奏耶

律忠交割珠玉之意及邦昌所說上云已錯了又云恁

地後怎生整頓得起望之奏又云三鎮豈竟交割勢必

用兵城下之盟姑隨順使去耳譬如富人家有賊三兩人盡日踰牆而主家知覺然得力强壯僕子出外幹事只有老卒稚童婢妮之類在家如何擒捕得獲今日之事何以異此陛下在東宮時聞朝廷人才軍政紀律帑藏財用將帥士馬如何大臣為陛下畫用兵之策但有可擊之理而不知無可用之人此不思之甚也上又云

已錯了

初种師道以謂三鎮不可棄城下不可戰在朝廷則堅守和議之約候姚古道來兵勢益盛同

共商量軍中自遣使人往謂三鎮國家選面所繫決不可割若割三鎮則我等將帥用兵無已時據三鎮賦入

所得增作歲幣庶幾和好久遠如遣使三兩轉勢須逗留半月重岳審爾彼必不敢遠去計敵孽生監糧草漸竭勢須北還矣過河以騎兵尾襲至真定中山貳鎮必不肯下彼腹背受敵可以得志李綱急于邀功以為迂濶遂用姚平仲平仲古之養子也先父帥環慶時奏辟古為副都總管望之於此時識平仲無庸恥誕妄人也嘗以度金帶質市易務錢數百千後事露古償之後來童貫以乃父之故成就橫行遙郡後從貫平方臘回京師嘗來相見誇大殺復魔賊之多綱信其說意謂可以殺金軍如殺魔賊也

四日庚申臣寮乞李綱依舊右丞 臣寮上言臣聞李

綱推孤忠自許之誠首建天下之大事蒙陛下處肱股之任雖愚情無知之人亦能歌舞忻忭况忠直有識之

士哉今日忽聞李綱緣用兵少挫已蒙加罪以常情論之固當責也以大事論之則臣別有愚見夫李綱起自孤寒奮不顧身施骨鯁藥石之論當被堅執銳之敵可謂忠孝之極人之所難能也然一人之智安能盡千萬人之所長惟聖人能兼之諸葛管蕭之亞匹也猶有治戎為長奇謀為短之說然劉備不謂其謀為短而不用也惟在人君因其所長而用之陛下若為李綱短于用兵令罷營使則已若更脫右丞之職民心定不安也非

特民心不安又恐天下以李綱緣忠正大用以微罪重責使賢良之士畏懼而不敢言也竊慮壅遏之弊自此始也臣不勝區區為陛下痛惜之伏望陛下察李綱孤立寡助特發宸斷始終保全令依舊裁決大事專意進退人材庶少裨陛下重光之明臣于李綱素非親識亦無一日之雅然採簽言獻于陛下也勿以骨鯁而棄之取進止靖康前錄曰先是二十五日綱自奉常除兵侍郎宰執辦事于榻前白時中等謂綱所言皆書生紙上

語綱云時中等不信用書生之言至于此今日庭辨尚
敢爾耶邦昌從旁力贊時中謂前此執政非不宣力綱云
邦昌等素無才術雖盡力何補上欲依景德故事置親
行營司邦昌等憤綱皆謂綱可以任事乃除綱右丞領
行營司及正月一日劫寨之敗邦昌等以綱不從和議
聞官軍失利乃置酒都堂快其夙忿故臣寮有是心
御史中丞許翰上言乞復用种師道臣伏見宣制樞密
使种師道提舉中太一宮中外聞之悵然失色按師道

名將沉毅有謀山西士卒人人信服臣以臺制不得身
見師道然素聞其賢如此自兵興以來臣所詢訪數百
人皆言師道雖以老疾智勇不衰而獨聞朝廷以為老
無計策不可復用異于國人臣考古進賢之法在易之
晉其六三曰衆允之志上行也夫人各有私合衆則公
故必衆云其賢也而後可進此孟子所謂國人皆曰賢
而後察之者人君之所聽察如此陛下欲求知人之術
則觀諸易象而請質之孟子臣恐左右大夫一旦之論

种師道不如國人素信之審也昔秦始皇老王剪而用李信兵辱于楚乃見王翦謝之曰將軍雖病獨棄寡人乎其後王翦卒能走楚軍畧定荆地漢宣帝老趙充國使問充國誰可將者對曰無踰于老臣者矣充國與羌相拒堅守不戰羌豪相數責曰語汝無反今天子遣趙將軍來年八十九矣善為兵今請欲一鬪而死可得邪後終漢之世無西戎之患者充國之力也前自呂望以來用老将收功如此者難一二數至于趙用趙括蜀用

馬謖宋用王元謨皆見其平日論兵智畧縱橫使之當
敵制變卒用皆折北不救以古揆今則師道之老而木
訥未當謂不可用也今令師道復統河北之師委制間
外之重將吏素服士卒素畏易以成功此上策也處之
樞府選將將兵威名方畧可以折衝此次策也今無故
解其兵權委之道館士氣消沮民心疑惑臣竊恨之金
人此行存亡所係今一大創之使失利去則中原可保
邊方可服失此機會則非特將來再舉必有不救之憂

臣恐西南一帶共知中國太弱爭圖深入為金人之所
為困于奔命必不支矣廷臣間憤憤不曉者固不足道
至于近有識者多能知之然知之者莫肯力言言之者
莫肯疏奏是又何也知為身謀畏執其咎一有疏奏形
迹可按不如容默成敗不與鄙夫事君自古而然臣遭
陛下休明之運啣陛下之恩自項放踵已許國矣又當
言責不敢不盡竊聞臺臣謀官屢劾宇文虛中朝廷重
去虛中而輕罷師道此非特臣所不喻也或謂師道足

不良行害于馳驅朝謁奏事此與國之安危誰為輕重
若孫臏坐輜車中為齊軍師田千秋得乘小車至漢殿
尊賢尚能古有之矣伏望聖慈哀臣惓惓憂國之計更
與大臣參之

靖康元年二月許翰為御史中丞

先是金師北歸師道見上言金人不知兵

後彼情歸衆其過河半擊之決勝可也上不從師道歎
息必為後害尋罷為中太一宮使翰累疏言師道不當
罷上曰師道老矣難用當使卿見之翰見師道言姚平
仲城下用師之失師道言我衆彼寡但分兵諸寨控守
要害使糧道不通可破矣
翰歎息其言復上此奏也

三朝北盟會編卷三十三

欽定四庫全書

史部

三朝北盟會編卷三十四至
七

詳校官麻吉士臣何道冲

編修臣裴謙覆勘

總校官檢討臣

何思鈞

校對官中書臣

楊世綸

膳錄監生臣

史致光

欽定四庫全書

三朝北盟會編卷三十四

宋 徐夢莘 撰

靖康中帙

起靖康元年二月五日辛丑盡其日

五日辛丑太學生陳東伏闕上書乞罷李邦彥用李綱
神師道書曰臣等聞任賢勿貳去邪勿疑者社稷之
主也奮不顧身死生以之者社稷之臣也妬賢嫉善妨

功害能者社稷之賊也恭惟皇帝陛下聰明英睿獨智
旁燭賢邪之分宸衷默判天下之重者李綱是也所謂
社稷之臣也其庸謬不才忌嫉賢能動為身謀不恤國
計者李邦彥白時中張邦昌趙野王孝迪蔡懋李稅之
徒是也所謂社稷之賊也陛下斷然不疑拔綱于卿監之
中不一二日任為執政中外相慶知陛下之能任賢矣
斥時中而不用知陛下之能去邪矣然綱任而未專時
中斥而未去復相邦彥復相邦昌其餘又皆擢用何陛

下任賢猶未能勿貳去邪猶未能勿疑乎今又聞復罷
李綱職事臣等驚疑莫知所以此必為邦彥等擠陷蓋
綱起自庶官獨任大事邦彥等疾如仇讎恐其成功臣
等聞綱比日用兵偶然小有不利邦彥等遂乘間投隙
歸罪于綱然一勝一負兵家之常小勝固未足為喜而
小挫亦未足為辱況示怯示弱竒謀秘計豈可遽以此
傾動任事之臣臣竊聞邦彥時中等盡勸陛下他幸茲
豈誠為陛下之計蓋時中邦彥初見事有驚各以差除

親黨旋領外任遣家屬隨之遠去豈有身為大臣不能
一家死社稷之難其意正欲于倉卒之際各有逃遁以
保妻孥自諸大臣一鼓而倡之百官有司羣起而和之
遂令京城之人閤然騷動弗安其居至聞羣臣勸陛下
他幸則中外恟恟不敢自保當時若非網為陛下建言
則乘輿播越在外宗廟社稷已為丘墟生靈已遭魚肉
陛下將有棄宗廟社稷之名何從復有天下賴陛下聰
明不惑羣議斷自聖志特從網請中外聞之雖愚夫愚

婦等無不舉手加額仰嘆聖德之盛綱之力豈曰小補之哉是宜邦彥等諧謗忌嫉無所不至臣等伏見邦彥等事太上皇帝享高爵厚祿為日最久坐視天下之弊未嘗肯發一言以圖補報至如王黼童貫蔡攸共興北師天下皆知其不可上皇決之雖唯鄭居中力爭以為不可輕舉而安中者之力贊王黼以遂其役邦彥等輩非不與聞此議而畧不可否于其間其寔亦皆陰助王黼以貽今日之禍使上皇痛自罪抑避位而去陛下新即

寶位遽有變亂之虞慄慄危懼不遑宵旰邦彥等並當引已歸咎自求貶放以謝君父而適當此危急之際尚敢偃蹇自若持祿固位坐妨賢路又復忌嫉賢能害國家之大計蓋邦彥首倡講和之議又許割地挫辱國勢今欲必遠前非以逋罪咎幸網小夫因緣沮敗陛下若聽其言斥綱不用則宗社存亡特未可知若謂金人真欲請和則既和之後尚敢攻我京城縱兵四掠屠我畿內敵人之謀急則請和緩則欲戰乍喜乍怒變詐百出

竊知今日困弊不可支梧聞陛下促任李綱自知志不
得逞請和之意必更激切而邦彥乃得藉口以沮成謀
遂致李綱罷廢罷命一傳士大夫失色兵民騷動至于
流涕相弔咸謂不日為敵擒矣則是罷廢李綱非特墮
邦彥等計中又墮敵計中也聞邦彥又欲增與騾馬等
物無乃假寇兵而資盜糧乎又聞邦彥等尚執前議必
欲割地與之曾不知祖宗土地得之甚難又況河北寔
朝廷之根本而三關四鎮是河北之根本若棄三關四

鎮是棄河北則朝廷能復都大梁乎能都洛陽乎且如太原一郡凡經藝祖太宗兩朝親征僅乃得之祖宗所以必取者蓋以其控扼二隣下瞰長安纔數百里今棄太原則長安京城千里已在其睥睨中朝廷又安能往都乎此祖宗所以特重兩河之地自真宗仁宗朝以來北敵蓋有割地之請矣朝廷寧屈已增幣以塞其欲至于土地一寸不肯與之聖聖相守咸念祖宗艱難之功惜國家要害之地不忍棄也今陛下即政之初邦彥等便

欲棄祖宗之境土不知待陛下作何等主也不知割與太原中山河間以北十有餘郡之後邦彥等能使金人不復敗盟否切恐口血未乾已引兵南嚮矣自大梁至長安既不可都必將遷而之金陵則自江以北非朝廷有況金陵正慮童貫蔡攸朱勔等往生變亂欲遷而都焉又不可得陛下將于何地而奠宗社邪又況保州乃祖宗陵寢所在一旦陷于強敵必遭暴露國祚長短所繫非輕邦彥等忍棄之邪其意不過欲紓目前之急不

為國家長久之計又不過欲沮李綱成謀以快私憤亦恐李綱功成之後自知前議之失罪有所歸故併力沮之期于必勝想邦彥等日在陛下左右每一言及李綱用兵之事必欲作驚怖之狀爭為危急之言以恐陛下聽其計以害李綱自綱遭遇不次拔擢邦彥等自知必不能安身朝廷之上乃薦引私黨以塞陛下進用李綱之路而王孝迪者又是邦彥姻家必為羣姦力排李綱以助邦彥而在臺諫者亦多邦彥等黨與前日邦彥等

請召國子監長貳相見乃聞祭酒謝克家除諫臣司業
孫覲除御史臣等在學備見此事衆心不平豈有天子
欲用耳目之官而宰相大臣前期召見以收私恩其意
安在臺諫之中鮮為陛下發一言以明李綱之無辜者
若綱可謂孤立無助臣等竊謂今日朝廷之上非特綱
為孤立而邦彥等自為身謀不肯以腹心事陛下恐陛
下亦成孤立矣可勝寒心天下共知李綱可以用大臣
等請為陛下言其一二頃歲京師大水自宰執大臣下

及百官爭占舟船或結木筏為避水計是時邦彥皆在朝廷曾不聞一人為君父計者亦不聞一人言及災異者獨綱慷慨為上言之至為姦臣譖逐數年不用前者邊報初至宰相骨肉盡皆出京獨剛妻孥未嘗遷徙陛下當此方深北顧之憂而左右無一人為陛下請行者獨綱奮然以身任之綱之用心可以見矣陛下何忍信朋邪之計而斥正人端士乎若以綱用兵小挫遂當廢罷則童貫創開邊隙以貽今日之禍近又引兵數十

萬以事雲中之役幾于匹馬隻輪無還者朝廷曾不議
貫之罪何李綱小挫而加罪乎若以敵請和遂欲罪綱
以謝敵無乃中其反間之術乎若曰邦彥等譖謗之故
遽廢斥之無乃遭愚弄乎一進一退在綱為甚輕在朝
廷為甚重蓋今日宗社安危在此一舉幸陛下即反前
命復綱舊職以安中外之心無終為異議所沮昔魏文
侯令樂羊將而攻中山當時異議沮之至有謗書一篋
及羊功成而返文侯出其書示之羊乃再拜稽首曰此

非臣之功主君任賢之力也唐憲宗討蔡數不利羣臣爭請罷兵憲宗曰一勝一負兵家常事若師常勝則古何憚用兵邪但論帥臣勇怯兵力疆弱處置如何耳渠一敗便沮成計乎於是左右不能容其間而裴度請身督戰卒破蔡賊史臣有言非度破賊之難任度之為難也故韓愈頌憲宗之功曰凡此蔡功惟斷乃成憲宗號中興之主正在于此惜其弗自克終也臣等竊願陛下遠鑒前代已然之事坐照今日異議之臣奮發英斷復

用李綱以成大功宗社幸甚臣等為陛下今日計莫若
斥邦彥等援綱而相之想吳敏耿南仲必與綱共事更
願速降詔旨召徐處仁唐恪等置諸左右而閫外之事
盡付种師道使專之內外將相之臣必肯悉心協助陛
下大有為于天下矣臣等學校書生素與綱無半面之
雅與邦彥亦昧平生所以必勸陛下進綱而退邦彥等豈
有他故哉蓋生靈之命與宗社存亡在陛下用綱與不
用去邦彥與不去之間天下公論如此臣等豈敢嘿嘿

陛下若以臣等之言為未足取信試御樓呼召耆老一問之呼軍兵一問之呼行道商旅一問之試咨百官君子使言之必皆曰綱可用而邦彥等可斥也陛下用舍之際不可不謹臣等以布衣之賤論及宰相大臣罪當萬死干冒天威不勝俯伏待罪之至李綱种師道既罷李邦彥堅主割地之議遣使議和陳東發憤伏闕上書太學生具欄鄣會于宣德門下者數百人同日軍民數萬會于宣德門同太學生伏闕乞用李綱是日會敵復

攻城軍民數十萬不期而會于宣德門下擊登聞鼓遇
內侍朱拱之撕臂死骨血無餘又邦彥適過軍民罵曰
李邦彥汝是浪子豈能做宰相拾瓦礫擊之邦彥躍馬
奔入朝堂乃免由是內侍官撕臂殺之張道濟而下死
者二百餘人淵聖登宣德門傳旨撫諭開封尹王時雍
以兵士數十人簇定東又命劊子數人不離左右主管
殿前司王宗澣亦殿前兵來往巡視東挺身于斧鑕之
間時雍宣言曰太學生以布衣敢劫天子當行誅戮而

淵聖命中使宣諭故東得免死百姓皆言金人攻城急
乞召李綱捍賊兵淵聖從之乃召綱復用為尚書右丞
盡兼舊職仍兼提舉城壁守禦便促登西壁百姓見綱
皆呼曰右丞且與百姓為主綱亦言曰綱已在此即登
城矣百姓不足憂促歸照管老小是日斬首亂者十餘
人移時方定邦彥等詣東以布衣脅天子不可赦淵聖
不從邦彥惶恐乃乞致仕

傳信錄曰初太學生陳東與諸生千餘人是日詣闕上

書明余及師道之無罪不當罷軍民聞之不期而集者數千萬人填塞馳道街巷呼聲震地擗登聞鼓于東華門擊碎之上遣吳敏耿南仲慰諭諸生俾之退反為軍民所壅不得行必欲見余及師道乃去不得報則殺傷內侍二十餘人皆鬻割之雖毛骨無存者又訴罵宰執李邦彥蔡懋王孝迪趙野等毆擊之皆走散藏匿于是上遣中使召余及師道入內對余聞命惶惧固辭不敢行而宣詔者絡繹而至中使迫促不得已上馬出浴室

院由宋門街抵馳道趨東華門軍民山積幾不可進召
中使朱拱之復為衆所殺蓋怒其傳旨之緩也見上于
福寧殿閣子中余泣拜請死上亦泣有旨復尚書右丞
充京師四壁守禦使余固辭上不允俾出東華門至右
掖門一帶安撫軍民余稟上旨宣諭乃稍散去再對于
福寧殿上命復節制勤王之師先放遣民兵蓋不復有
用兵意 朱邦基靖康錄曰初五日會太學生陳東千
餘人伏闕上書訴邦彥考迪野稅愁等懷姦明網無罪

而罷社稷其危乎請復之國中軍民聞以為義不約而會者幾數十萬人且乞復种師道盖師道之罷諭士猶未知也書奏上遣腹心臣門下侍郎吳敏諭以德意樞密耿南仲且訪求民情焉又遣內宣傳云才候金人退師復綱舊職諸生謝恩師退而軍民固留不可圍之百匝以至老父泣涕懇切言曰爭鬻輿不出固守乘城以活我國人者李右丞也進逼敵營衛我國人使金人不敢剽掠者种樞密也危社稷棄國人罷我右丞樞密以資寇者李

邦彥李稅蔡懋也諫官御史無一言及之賴諸公義不愛其軀危言扶傾持顛衛我國人期于得請而後已與其死于敵人之手何若觸逆鱗而死于君父之手乎人之有欲天必從之幸諸公遲少頃俟宣李右丞种師道即去未晚伏闕自卯至午山呼震響聞數十里以致取登聞鼓而擊之破以助號愬之聲使九重聞之久而不報軍民痛憤宰執誤國致冠指罵以為國賊衆口一音歐殺內侍御樂承宣二十餘人皆以為蔽塞君上聰明

懷姦召亂願以死為國家除蕭牆禍根人人踴躍開封
尹王時雍雖以軍法彈壓不能禁也上繼天聰明乃宣
網師道入還舊職軍民咸以手加額為得請而去網即
登城復嚴守禦而金人薄城者奄忽遁無一人所謂獨
脚皂旗與夫紅燈籠者初得之未恠也是夜望金人軍
俄有舉紅燈二炬者乃知召內應者以此物為驗皂旗
亦金人之所建軍民覺而揣其奸詐殘害之至有自投
城而斃知其必不免者皆中人也明日方平等悉罷坐

視者送之獄羣姦遂戢內侍祖宗時位不供奉進子寄
祿皆有常格自蔡京怙寵固位交迎近倖而尊寵之內
外政事無小大未有不關內侍省或建節旄或領師傅
又有領三館者有封侯王者天子呼而不名侍而不立
宰相往往其門生執政大臣順意者榮華遂旨者枯槁上
新即政英明素憤將欲鋤去未有以發適于是時軍民
殘而食其肉者偶中魁傑遂破其黨與茲寔天啓佑我
宋假手軍民不勞而誅之也乃下詔曰童貫等妄興邊

事懷奸蠹國並往東南在京如梁師成譚稹李邦彥已
下遠竄所存者百餘皆小官踈遠之人並非從來被童
貫任使享祿者令寄祿進子恩數一遵祖宗舊制中外
悅服 宣和錄曰初种師道為宣撫使李綱為親征行
營使姚平仲謀劫寨數日行路皆知之敵先為備一日
出師以為功在頃刻矣行營司屬官方會封丘門草露
布忽報失利上震驚于是罷綱權并解其職俾待命浴
室院師道亦罷宣撫使以右丞蔡懋代之復議講和命

守城卒放弓弛砲無得輒傷敵初五日大學生陳東率數百人伏宣德門下上書集軍民數萬人相謂曰非見李右丞种宣撫復用無得歸會百官退朝自東華門出至闕前衆指宰相李邦彥數其罪嫚罵欲毆之邦彥疾驅而免領開封府事聶山舉鞭揖東等曰諸公為此可謂忠義矣邏者以聞上命閣門索所上書頃之中人傳旨令諸生上書朕已親覽備悉忠義當放行其中有欲散者衆闕然曰安知非偽耶須見李右丞种宣撫復用

而退于是知樞密院吳敏傳宣曰李綱用兵失利不得已罷之俟金師稍退即令復職猶不退時日旰矣百姓乃興登聞院鼓置東華門外搥而壞之山呼震地樞密耿南仲至諸生曰先生前日為天子傳宣言無不行軍民之意堅欲復用李右丞種宣撫幸先生言之南仲曰當便求對以諸生之意奏上衆慮南仲詐擁其馬不得歸南仲亦徑入朝繼而開封府尹王時雍來謂諸生曰脅天子可乎胡不退諸生應之曰以忠義脅天子不愈

于姦倭脅之乎復欲前歐之時雍逸去殿帥王宗濞謂
上曰事已爾無可奈何當勉從之不然且生變遂遣
南仲號于衆曰已得旨宣李綱矣百姓數千人詣浴室
院迎之帝益恐于是相繼而宣者絡繹不絕內侍朱拱
之先得旨宣綱未到而後發之使先至衆取拱之鬻而
磔之即矯制曰殺內臣無罪又取十餘輩殺之皆裂其
屍碎其肺腸揭之竿首號于衆曰此逆賊也綱既對即
詣行營司而師道亦歸其宇士庶知其復用也遂散是

晚天子下詔曰士庶伏闕上書願見李綱种師道朕已親覽深諒爾等忠義令綱師道傳宣撫諭若更乘時恃衆亂行毆打令綱師道以軍法從事是夜復聚衆殺內侍而殺其家者數十人靖康前錄曰初五日太學生陳東率諸生上書伏闕訴李邦彥王孝迪懷姦明綱等無罪而罷社稷甚危乞請復之以慰人望既至闕下軍民不約而會數十萬書至日旰未達學生不過三百人軍民擁之雖欲去而有不可衛士為之說者此去禁中

遠不如往東華門撾鼓于是衆詣登聞鼓院推鼓滾之于前數萬人挾東等撾鼓于東華門外至擊破之以助號呼聲徹九重上急遣中使宣种師道李綱入復還舊職初患不達既已追入久之不聞宣命快行行謂民衆曰朱御藥受宣劄下不肯去移刻一中使出或者曰此是朱御藥時衆方憤疾即拽下馬絲裂其屍其餘同時被毆者張太尉等三十七人百姓爭鬻之須臾而盡諫官唐重師驥臺官鄭滋等相繼而去兵民以种師道李

綱未入挽其袖使入諫是日交直种師道李綱被旨而
來復令處置守營司等事士民歡呼以手加額及二公
入內被詔諭出再四慰勞軍民長揖而退

三朝北盟會編卷三十四

欽定四庫全書

三朝北盟會編卷三十五

宋 徐夢莘 撰

靖康中帙

起靖康元年二月五日辛丑盡其日

德安府進士張柄上書乞罷蔡懋復用种師道臣謹按
尚書右丞行營司李綱忠亮剛方有為有守功在社稷
澤被生靈萬口一談人神繫命方金人入境而奮不顧

身自請督戰蓋陛下裴度也臣竊見綱於膽對之際有能無主憂臣辱義在必死賊未授首臣無還期之言是宜陛下待以心膂無或携貳比聞出師攻城為統制將校不肯入敵馬前退衄遂策廢罷成命已行兵民失措為忠義解體矣臣聞兵不多不足以取勝必勝之師不在速戰兵多而戰不速則所費必廣又況兩軍交鋒有勝有負此臣所以知左右之人以綱進用之驟畏其敢言不能無異議而陛下聰明之德不能無疑惑也又况

用之專則權為人所畏信之篤則寵為人所忌此有識之士為網寒心顧有日矣然心比小却未應發達如網一斤不復再用臣恐將帥各懷危懼不能自保矣忠義解體將帥危懼不知陛下孰與平敵也前日與敵講和而貪求無厭湏索不已遂致京城經日圍閉今網既斥不復戰敵是欲講和不知陛下能使其必去乎臣願陛下念網社稷之功兵民具瞻之情亟復其職乞罷蔡懋盡付兵權於种師道無使固位貪利之黨快其私心天

下幸甚 李邦彥罷宰相觀文殿大學士太一宮使紀
實曰李邦彥為都人所憤怒纔出門爭呼毆擊將殺之
馬逸偶脫百姓獨得其履因乘婦人小輿乘黃裙轎簾
上命密匿於啓聖院以丐罷待命得去始敢去 諫議
大夫唐重劄子攻守利害三事一事金人以議和好兵
退有期而行營司與宣撫司密相通謀虛張兵數以罔
朝廷致姚平仲矯制用兵自取敗衄罪狀甚明奏報具
在自有軍法不假臣言臣今體訪得行營司嘗密遣人

檄中山河間等郡令以死禦敵宣撫司亦有文移責河
北諸郡縱敵內侮之罪令擊歸敵以圖後效密具蠟書
間道馳達此固兵家之祕計未知二司若果用之臣決
知敗事如姚平仲奏報已先得與金人城下之舉百步
之內踈繆若此豈能馳一介之使而寄千里之命乎若
使金人獲之為隙滋甚必謂中國陽為和議陰行詐謀
本虧信義愈結兵禍雖得蘇秦張儀為使亦不能以口
舌爭矣此甚可憂也伏乞明降詔旨諭以堅守盟約如

有詐謀反輒拒命者詔少宰張邦昌以軍法處置訖奏
庶以解金人之疑早令退兵免招後患一臣於初三日
自登城觀兵不成行戰全無紀律騎兵不肯鏖戰前致
敵騎衝突遂敗我師又訪聞西師夜擊止餘後軍姚平
仲遁去不知所在今來种師道老病難責以臨陣在外
兵馬全無統領恐有不虞乞日下選武官曾歷邊任有
武畧之人充統領制令總集諸路兵馬分屯結營嚴明
紀律守衛京城一臣訪聞賊兵張仙等會集近甸意欲

乘間劫取金人金帛兼四方勤王之師相繼畢集其間多是烏合之衆不能無姦人若貪利忘義私相攘奪有虧和好致金人之疑愈滋外患乞下令告諭以解敵疑兼詔張邦昌等令委曲具白大金太子可早速退師以堅盟約右前項事宜並急切不可少緩伏乞睿斷速下三省樞密院同共商議早賜施行取進止 太學生雷觀上書論李邦彥張邦昌不用二月初五日太學生雷觀昧死百拜上書於皇帝陛下臣生三十六年矣自十

五總角為學校諸生執經之暇喜引古以論天下事當是時擅權之臣新鉗天下之口臣父兄師友聞臣小有激昂則必深戒力止以謂寧結舌以保身毋多言以取禍臣亦自知遠方寒士徒說說實無益惟不信權臣能絕人言以蔽人主聰明也歲在戊戌例貢辟雍復移太學首尾九載具知一二權臣果能以身塞言路恣其姦惡而臺諫官徒備員以進身間或言非已所不利則是必為人之鷹犬不然摘細故以塞責耳嗚呼祖宗綱紀

法度掃地殆盡使天下之民咸不得其所飲恨宿怒無所告訴至使四郊多壘兵連禍結成今日之事者皆言路不通上下蒙蔽之塞也言路不通而微臣因以杜口二十年矣頃為宰臣者建言置司講議天下之事聚十數輩親附之人觀望阿諛所論皆毫末之細議罷一事奪於權幸則朝言而暮復舊矣何嘗有一大利害及於生民哉善乎臣之友生高聞之言曰天下之利害當使天下之人議之聞因對講議司策而為此言誠至言也

何者天下之廣歲月之深事之害利不可殫舉苟非身受其害豈能盡得其實今日張官置吏文書往來而欲天下除害興利豈不繆哉是故古先哲王求諫納善惟恐其不廣也置敢諫之鼓植告善之旌垂慎戒之鞀立司過之士猶懼其未也又設官制以言為常由是史有書瞽為詩工箴諫大夫規誨士傳言庶人謗尚恐其怠也每歲孟春道人以木鐸徇於路而振警之官師相規工執藝事以諫其或不恭邦有常刑其所訪聞不甚廣

歟夫如是則王之身國之政其有不善歟天下之利害
其有不達歟茲所謂與天下之人議之也天下之人得
以利害之言盡聞於上則當言之人雖欲緘默取容不
可得也官已盡其職則報政之臣雖欲取容為人不可
得也言路通而輔相得人則太平之治豈難致哉恭惟
皇帝陛下孝友之性恭儉之隱仁民愛物之心本於生
知而行以至誠格於上下久矣臨御之初臣已知天下
利害從此必得聞於上而下情無有不通者未幾求言

之詔果下旨意丁寧臣伏讀感泣者累日且語諸友生
曰前日之言固以為恨今日而不言豈不負愧咸宜誦
所聞見以報吾君也然詔下踰日上封事不減千數而
未聞曉然有求言之實臣竊疑之豈求言之詔徒為文
具邪抑獻言者皆猥冗不足取耶無乃付之有司而執
事者尚徇前弊沮遏而不行耶不然何故惟聞陛下每
勤乙夜之覽而未聞緣某人言某事實為利令行之緣
某人言某事實為害令罷之此獻言者不能無疑也說

命曰非知之艱傳曰忠言逆於耳而利於行則求言者
斯受厥咎今日求言之詔徒為文具或執事者沮遏不
行天下之人復鉗口結舌如前日矣臣將見干戈擾攘
之禍未易安定天下必至於大亂矣倘其所言皆屑屑
細故不切時務則可再下明詔以申諭之不可謂其言
無足取而遂已也臣恐士大夫尚以前時直言掇禍為
戒未能披赤心以仰承陛下求言之誠此臣所以首陳
之也臣素愚直敢以切至之言上千冕旒觀陛下果能

行與否焉詔旨之所詢朝之闕失政令之僻違保邦御
俗之方安邊禦戎之策之數言者固皆國家之所急也
而當今之務有急於此者止一言而已陛下知之乎已
知則當不待微臣之言若猶未也臣謹為陛下下言之所
謂一言何也論相是也蓋人主無他職事惟在乎一相
得人則百官皆賢百官稱職則庶事咸理否則亂矣商
之衰中國失道外蕃交侵高宗卒能行撻伐治中國成
湯孫之緒致中國之盛者其本在於得傳說以王命居

冢宰之任總百官之職進言乎王探為治之本亦曰惟
治亂在庶官而已何則庶官得人則治庶官失人則亂
天下之治亂係乎庶官之得失庶官之得失係乎一相
之賢否任宰相者天子之職進退百官者進一相之事
高宗以命說為急傳說以庶官為戒此商之所以中興
也國家崇寧以來俾張治具欲飾太平而天下靡靡日
入於衰亂者皆由相非其人也相非其人庶官以類而
進私昵者官之惡德者爵之賢能之士乃斥逐不用惟

用姦黨其始亂不待今日而後見識者已分於崇寧之
日矣雖欲正刑明辟嚴悞國之誅固自無及言之復為
何益乎然不極其為亂之階則莫知其據亂之道臣為
陛下畧撫前朝宰相姦術之大者言之假紹聖二字以
行已之詐假國是二字以主已之奸假享上二字以充
已之私進直言者槩以狂妄斥之立正論者槩以邪說
禁之善阿諛者乃以純正用之奸術既行無所忌憚故
敗壞法度紊亂綱紀無所不為莫可勝舉致使強敵幾

危社稷而陛下受莫大之屈辱者皆相臣非其人之故也陛下即位已來見於施為者慨然有求治之心而論相之職亦未為稱此臣所以為當今之急務也白時中老繆無用罷相之日公議稱快咸謂陛下必能擇賢而相之中興之治可立待也翌日宣麻但遞遷李邦彥張邦昌爾士民大失望皆言邦彥邦昌亦前朝輔相之無狀者未能罷黜猶之可也其可遂相乎以臣觀之邦彥邦昌雖未若前者數輩為大姦惡察其搯術亦不過持

兩可以固位養恩而已前日輔相之無狀姑置勿論矣
自陛下即位以來一二大事邦彥邦昌曾有慷慨一言
乎肯以身殉國自當一面乎邦昌奉康王入敵營為此
不得已也至無恥也賢者必不肯當宰相之任而甘心
為此行也邦彥邦昌於無事之時妄有除授召收親黨
以為強助及多事之際假使命散遣親黨以送妻奴其
何以率百官為國藩捍乎聞播遷之說則樂從盡效死
之計則退縮其何以安百姓為國柱石乎敵所欲者與

之不聞有忠義一言奮然以折敵人之心其何以威撫
外蕃使之畏服乎蠹國害民啟戎招盜十數巨姦天下
之人思食其肉不饜而邦彥邦昌初不敢誰何致因人
言稍稍罷黜詎能不畏強禦而退不肖乎當此紛擾其
所進用尚皆親黨選論百官或不當職能以公滅私進
賢者乎總統百官安堵百姓威撫外蕃進賢退不肖皆
相事也邦彥邦昌踈謬如此決不可當今日之危急也
陛下知求言從諫而未知論相何先後緩急之失序也

使中外臣寮士庶誠如詔旨盡知所詢利害上聞之日
陛下獨罷行之抑須付之輔相罷行之耶獨罷行之非
人主無為之道付之輔臣如邦彥邦昌必無能為也陛
下知以是為急乎亦未嘗以此訪之羣臣乎竊慮有為
陛下言者必曰天下安注意相天下危注意將今日金
人逼城宜以命將遣師為急餘事姑緩可也此殆悞國
之尤者臣以為不然天下安危皆在注意於相相得其人
則將必成功相非其人則將必敗事蓋將之出入謀畫

必須以相為腹心將雖良而相不賢則失謀畫有畫餅
之饑臨敵有掣肘之禍幾何不悞其事哉裴度為相李
愬成淮西之功楊國忠為相哥舒翰有潼關之失此事
灼然者其監不遠也前朝自蔡京為相遂以童貫為將
興西北邊事二十餘年西北之良將勁兵所陷失者莫
知其幾矣竭天下之力給二邊之費者莫計其數矣今
日之事為利耶為害耶此日前之監也陛下以邦昌身
在敵營未可遽罷則邦彥何為久留也陛下若不急罷

邦彥則雖有良將必不成功祇益取辱爾臣聞道路之言謂邦彥與二三黨類堅主割地之說閫外之事未能一切付之將帥割地一事係國之利害臣知建言者已熟計備陳矣臣不復縷陳惟知邦彥罷則廟謀必振將權必專割地之說必不行金人之計必消沮矣臣又慮有為陛下言者必曰邦彥邦昌曩在政府亦嘗以燕雲之事不可圖童貫不可再遣今果如其說正當相之臣以為不然邦彥邦昌在政府日果如此則當力陳其未

可狀至不見聽則以死繼之縱未能以死諍則宜去職
位亦可其言邦彥邦昌卒持祿不諍致此危急其心不
過畏童貫之禍也豈有持祿畏禍之人而能為相乎臣
又慮有為陛下言者必曰用則為虎不用則為鼠人才
顧用之何如耳邦彥邦昌在前朝未能信用何如試之
可也臣以謂不然人臣起自布衣致身政府其寵祿亦
可謂盛矣其職位亦可以有為矣邦彥邦昌立朝以來
曾達一言行一事有當於人心者今相之可也而二人

所為不過憑附權勢交結宦官希旨道諛以速顯仕而已豈復有它學術乎今天下之勢甚於倒垂縱之惟患其不疾又豈可以相事而復試無能之人也臣又慮有為陛下言者必曰邦彥邦昌不矜智能以任羣材乃得為相之道臣以謂不然甄天下之才而用之使之各當其位各盡其職以治庶務為之相者坐享其成功如柳宗元梓人之說此非真有相才者不能如此邦彥邦昌以私害公所引用者多非其人或用他薦得一賢士則

又處之非其宜用之不盡其才賢者多自引退若久在
相位必不能為陛下進天下賢者成真相之業也臣又
慮有為陛下言者必曰宰相之任不可輕付須於貴臣
中進擢難以驟用臣以謂不然今日之禍皆肉食者之
過正當擇人而用之或有功於社稷者或士民所望者
雖小官雖陞任雖謫籍皆可起而用不必拘於資格傳
說版築之賤高宗立之為相不疑而中興之業乃成說
豈素貴乎東漢陳龜曰三辰不軌拔士為相四方不靖

拔卒為將今何等時遞遷貴臣耶臣又慮有為陛下言者必曰今日金人直入京邑亦天數也非人力所能止也不獨輔臣之罪也此尤姦之甚者臣以謂不然自前朝失謀與北朝結好人皆知其必為中國患邦彥為少宰踰年邦昌在政府又久何不為國家長慮却顧豫為之備致令衝突直造於此前日邊臣以敵必敗盟為言邦彥邦昌曾莫之省傳曰顛而不扶危而不持焉用彼相其可歸之天命耶臣又慮有為陛下言者必曰金人

之禍乃邦彥邦昌輩阿諛所致必使之任其責不可於
擾攘間聽其求去此乃妾婦間之說非為國之道也臣
以謂不然知賢而不能用知不肖而不能去此最有國
家者之大患邦彥邦昌既無智慮謀之於其微必無計
策禦之於其後遜之而專任賢者可也世有為人之傭
工者取其直而敗其事則主人必去之豈有謀吾之國
既已悞國復固執而責成耶二人黨類為之地者臣言
之極矣不識陛下曾受此等先入之言乎若有一端之

說嘗悞聖聰則可以鑒察其餘而邦彥邦昌不可相決矣二相如此其餘在政府者尤多不才不足論也周官曰明王立政不惟其官惟其人又曰官不必備惟其人苟得其賢者一二在位足矣闢茸之人雖布滿朝廷顧何益於事而必優容寬假之不畧加沙汰哉太宗皇帝嘗謂侍臣曰國家若無內患必有外憂若無外憂必有內患外憂止不過於邊事皆可豫防惟姦邪無狀若為內患深可懼也帝王用心常須慎此嗚呼聖訓不其切

至歟今日金人來侵如此可謂外憂矣若用非其人更
為內患則陛下如何為國臣所以寒心也願陛下稽考
太宗皇帝之聖訓而蚤加慎焉然則當今為相如之何
而可臣愚以謂必智慮忠實學術正當德足以服人才
足以應變通知祖宗以來典故而於進退百官之間能
以公滅私不畏且怯夫然後可以鋤去姦惡汲引賢能
革極弊之事而布維新之政以濟生民以保國家則中
興之業陛下成之易矣金人何足慮乎自祖宗以來相

臣多以言官論列直指某人可相某人不可相無非天下之公議此最爲我宋之盛典比來臺諫一蒙時相拔擢則多懷私恩無有直言者矣此亦不可不察也今日之相莫若陛下誠心廣求虛已任用不可聽厚誣之言天下無其人也仁宗皇帝至和中罷陳執中相而並用文彥博富弼二相久有人望正衙宣麻朝士相賀仁宗皇帝密遣小黃門於百官班中探其議論間有相賀得人之語喜謂歐陽修曰自古人君用人或以夢卜苟不知人當

從人望夢卜豈足憑也茲事著之寶訓傳之士大夫至
今為盛時之舉不誠黷陛下求賢必能用仁宗之操
柄探縉紳之公言從中外之人望不待愚臣之喋喋也
臣伏自覩陛下詔書求言便欲少竭愚衷以伸二十年
區區之志竊臣人物至微若論細事則不如不言之
為愈前草大利害書未及上而陛下先已施行恐成觀
望遽即寢罷今乃輒言二相為人深若僭越然臣嘗謂
鄭子產不毀鄉校猶使議及執政之善否況天子建大

學以取士論政為本而又有求言之詔且申誠曰毋回
隱以溺於導諛苟若畏禍而不陳其愚臣實恥之干冒
天威臣無任戰慄待罪之至

三朝北盟會編卷三十五

欽定四庫全書

三朝北盟會編卷三十六

宋 徐夢莘 撰

靖康中帙

起靖康元年二月辛丑盡十一日丁未

五日辛丑康王及張邦昌歸自敵寨以張邦昌為太宰
肅王及太宰張邦昌附馬都尉曹晟質於金國軍前是
日皇弟肅王樞少宰張邦昌除太宰著作郎沈晦借給

事中使韓黑雅布軍前金人請以越王代康王為質上以越王叔父不可遣乃遣肅王樞及附馬都尉曹晟以行晟尚榮德帝姬與上同生故遣之避金主名改晟曰實遺史曰初康王之為質也金人見而憚之遂欲別易親王并要附馬都尉一人是時割地議和已定金人歛兵以待之乃遣邦昌太宰從肅王及附馬都尉曹晟為質

六日壬寅下廢苑囿詔詔曰比年以來京師拘收拆毀

民居甚衆至民無所安居應苑囿宮觀有可廢以與民者三省樞密院速條具以聞

七日癸卯開封府榜詔書安撫士庶開封府奉聖旨乘時作過人開封及行營使司並斬訖竊慮姦人妄說事端將不魯作過之人撰造其罪恐嚇平人仰出榜曉諭朝廷又出手詔安撫士庶詔曰童貫等妄興邊事懷姦蠹國悉皆東下前往浙江如梁師成譚稹李邦彥已付遠竄所存百餘員皆是小官疎遠之人並不係從來被

任享厚祿者今又自陳乞依舊寄資數等一遵祖宗之
典百姓無知鼓唱率衆擅行誅戮劫奪財物震驚京闕
皆不奠居已指揮李綱并三衙分頭彈壓捕為首之人
悉行軍法爾等各歸常業毋陷極刑尚敢結集仰徒中
反告支賞錢一千貫咨爾黎庶仰體朕意 尼堪駐軍
於中路尼堪自河東來遇城必攻比斡里雅布其行稍緩
至中路聞和議之詔遂止不行

八日甲辰再下行遣內侍京城不得倡率指揮聖旨內

侍官給役禁庭舊法嚴密歲來廢紊侵職撓權比取其
罪狀暴著已加顯罪又命請給恩數官稱職寄資進子
盡遵祖宗法所以檢制裁抑無所容貸尚慮京城之人
未知近日行遣推平時之心猶懷忿疾不分善惡槩加
凌侮已令開封府三衙以軍法彈壓自今更敢有扇搖
倡率不從令者並斬訖聞奏咨示衆庶明聽朕意靖
康錄曰初京城之戒嚴也城上設樓櫓及火砲弓弩鎗
仗之類皆元豐舊制器械有餘而兵不足先令百官與

軍士上城相雜守禦而以内侍官分部統之敵叢矢射城上内侍令守禦者不得動且曰國家以金人講和不至相鬪有一軍士奮怒曰既已講和何得射我引砲石擊賊一發殺數人中官殺之軍士由是不敢動乃自城中傳呼宦官欲開門納敵及伏闕之曰軍民數十萬聚於宣德門下遇内侍朱拱之撕擘死骨血無餘又内官得詔召李綱寘於懷不去於宣德門下曉諭百姓令退衆怒毆之於其懷中得詔書即大呼曰内官隱匿詔書

將作亂又殺之凡見內侍皆撕臂殺之死者二百餘人
有司以聞上懼生變即令殿前班一軍士口傳上旨云
殺內官者免罪其人於衆中妄呼曰殺宦官者無罪百
姓聞其語遂羣入內官之家所遇輒殺掠其財物又相
聚入其家搜獲兵器不可勝記皆輦到行營司交納其
內侍皆逃竄財物畧無孑遺走入禁中不敢歸於上前
泣訴於是命李綱根治斬三十餘人磔其尸於市方定
李綱种師道復用凡內侍官城上守城及諸城門監守

者皆去不用方知所謂獨脚皂旗紅燈籠乃中人欲為
內應者先是宣和中內侍多有賜第者官舍或隘陋即
委府尹於傍宅置門然未嘗給其直而實奪之京城百
姓或累世所有惟以屋舍既為奪去則無所托身惟與
妻子日夜號哭告天而已又科歛百姓財力營造宮室
臺榭或有擬於宮省者百姓應副不辦則督責箠楚有
至死者又每至街市買物已售其價令賣者隨至其家
所直皆不還或止償其半巷陌衢道馳騁縱橫侍從赫

奕呼喝行路莫敢語者然是時宰相大臣多出其門內
則有蔡京王黼為之腹心外則有王革盛章為之爪牙
故敢肆其兇惡至是百姓積怨乘亂得甘心焉 上賜

宴於斡里雅布軍中 斡里雅布上書辭別書曰大金皇子

郎君斡里雅布等謹上書於大宋皇帝闕下昨者受命專
征以上皇渝盟是問靈旗南向直抵京城伏承皇帝嗣
立再請修好遂依元奉詔旨酌中計議者定盟約日復
貴朝奸臣誤國妄起釁端於是當司實懷疑憤深諒大

信克保有終前日之盟非此為比且大軍之來資索頗多上瀆聰明下匱民庶事在不已固非樂為竊火一縱收之實難自非皇帝仁明遠畧屈已愛民安能使此禍危翻然為福今茲大計已定而後無以舊事為念惟祈永於誠議共庇生靈又承所賜書內該越王以叔父之尊平日奉事姚平仲死於鋒鏑李綱止從貶責其於宰執間求退罷免者甚衆既聞此言敢不孚聽及蒙城中軍民不遵號令實恐轉生變亂以昭聖憂當司本國安

定貴朝宗社永固和好遂令城下諸軍退保舊寨須是
即日班師伏念陛下即位之初必欲推恩布澤以矜衆
志特於元定賞軍物內減金萬錠銀一十萬錠表裏一
十萬段以充振乏廣施之用外有喝下金帛頭匹更望
止於今歲逐月接續交還今方言旋非不詣闕庭展辭
少叙悃悞以在軍中不克如願謹遣左金吾衛大將軍
宣徽北院使韓鼎桂州管内觀察使耶律克恭充大辭
使副有少禮物具如別幅謹奉書奏辭謹奉別幅人參

伍拾秤 簽書樞密院事宇文虛中知東上閤門使王
球充送路使副特書叙別書曰大宋皇帝致書於大金
皇子郎君皇弟國王皇弟都統茲審肅整軍威遠臨郊
甸敢急省愆之意遂蒙兼愛之仁再講隣歡復安敝邑
感深肌骨賜重丘山更承念及府庫之虛減金帛之數
益仰高明之意特深極芘之懷載遣車輶稟告還馭再
三誠懇每荷矜全豈惟恩加於危難抑亦義重於乾坤
惟有謹守信盟庶可仰酬厚德屬宗祧之有守阻道路

之叙違益慎寢饗永綏福祿所有贐儀飲餞已載前
書伏惟亮察謹白

九日乙巳奉聖旨將團結民居權令放散刑部侍郎王
寓劄子寓見管京城四壁守禦却見近日團結四扇居
民追呼在城下準備上城百姓驚擾離家失業人人有
溝壑之憂契勘閉城日久居民艱食若更如此是重困
也况四壁城上守禦兵卒器仗並已足備而民居烏合
皆無足用之人特可準備臨時搬運矢石耳必不得已

且令團結成保籍定姓名緩急追呼亦似無害矣伏望
速降聖旨候指揮奉聖旨依權令放散

十日丙午韓里雅布上書謝恩書曰比者已復舊好即議
師還伏蒙聖慈差開封少尹就詣軍中賜韓里雅布等茶
果龍腦藥酒并差去人使韓鼎裔回復承親賜通犀街
帶一條以隆餞別之禮仍被旨重稠昭宣大信仰認聖
慈曲周用殫砥礪欽領之餘尤增感篆當司遂促歸期
今月十日已令大軍旋旆所祈陛下社稷載寧生靈休

息有少禮物具於別幅謹奉書奉謝別幅人參二十秤
下割三鎮之詔差路允迪宣諭守臣詔曰勅太原府守
臣應中山河間太原府并屬縣鎮及已北州軍已於誓
書內議定合交割與大金事昨者大金以朝廷招納叛
亡有渝盟誓因舉大兵直至都畿重以宗廟社稷所係
甚大遂割三府以尋懽盟庶銷兵革之憂以固兩朝之好
其犬牙不齊去處並兩平允易合照誓書施行如有州
軍未便聽從仰將此詔書通行告諭各務遵稟毋或拒

違自取塗炭兩朝封疆接畛義同一家各寧爾居用保
信睦其中山河間太原府并屬縣鎮及以北州軍見任
寄居職官不係本土及從內地差去不在交割之限今
差朝散大夫充資政殿學士簽書樞密院事路允迪賁
詔宣諭咨爾守臣體予至意故茲詔示想宜知悉春暄
卿等各比平安好否遣書指不多及起發犒軍銀綱
至金人軍前李稅議和許以銀一千萬兩犒軍稅親至
內藏庫催出銀提點官內侍王若冲監出銀每十萬兩

為一網以一百人搬擔以使臣二員押發凡一百網起
絕一千萬兩之數皆出於內藏庫不知士庶之家輸納
者何以用之此與王孝迪督金銀榜示之數不同未知何
如 簽書樞密院事路允迪工部侍郎滕茂實使於尼
堪河東軍前尼堪兵將至高平而城下之盟已成既遣
肅王使於韓里雅布乃議不可不使尼堪遂遣路允迪滕
茂實使尼堪于河東且告割三關之地也 復用李邦彥
為太宰李邦彥方罷數日張邦昌又以太宰出質左右

揆皆虛位吳敏乃以劄子乞復用邦彥為太宰河北

路兵馬鈐轄李侃以兵二千與金人十七騎戰敗績和

議已定金人遣十七騎持文字報其國中經由磁州李

侃以身為兵官且承掩殺之旨

初金人抵京師也淵聖詔河北州軍畧曰种師

道姚平仲遠提西兵以助天討云云

深恐宵遁令河北州軍盡行掩殺乃率禁軍民兵二

千往擊之與十七騎相遇金人曰不須用兵今城下已

講和矣我乃被太子郎君差往國中幹事侃不信欲與

之戰十七騎者分為三以七騎居前各分五騎為左右

翼而稍近後前七騎馳進官軍少卻左右翼兩勢掩之
且馳且射官軍奔亂死者幾半金人退師遺史曰金
人既退种師道請臨河邀之三戰可使無噍類若縱之
去他日禍不可測李邦彥不從罷師道為中太一宮使
五日一到朝堂議事以姚古种師道折彥質范瓊等領
兵護金人過河邦彥奏立大旗於河東河北有擅出兵
者並依軍法金人揭榜不虜掠信德府初金人陷信
德府執守臣楊信功至京城下既已議和乃番信功朝

廷議失信德府之罪信功與通判梁訓禮皆貶嶺外兵將官分送廣南安撫使劉韜奏司錄已下皆是脅從放罪金人渡河獨揭榜大畧謂攻擊京城朝廷遣肅王及太宰張邦昌持書言奸臣姚平仲誤國已許割三鎮以北地請和緣信德府不係所割之地並不得擄掠

十一日丁未金人質肅王同行先是以康王為質以康王語言不遜金人不愛也復令入城至是遂以肅王行焉种宣撫奏言歸必不設備請邀諸河候其半渡可

以擊之李稅等在上側云以為掣肘論難既久終不許
擊然上心欲無如之何於是師道發憤感疾 靖康遺
錄曰敵之來雖少有抄掠而不殺害人民比去所過皆
殘破其所得漢人並活之使控馬荷擔隨其馬後驅之
去老弱者舍之自京師至黃河數百里間并邑蕭然無
復繁盛時景象矣可勝浩歎 太學生楊誨上書論割
地二月十一日太學生楊誨謹昧死上書皇帝陛下臣
聞金人至京師掠近輔殘馘夏人以騁其欲雖漢唐全

盛之際容或有之文帝之十四年匈奴候騎至雍甘泉而唐太宗貞觀之初突厥掃城入寇抵於渭上當時此二國承父兄餘資兵銳馬多傲然驕氣直出百蠻上視中國為不足與故能一舉而騎甲蒙帝都其勢可謂盛矣然竊考文帝太宗所制禦二國之術甚優游暇豫者此其故何耶蓋漢唐當天下無事時廟堂之上君畫臣謀能以戎務為急一旦事起倉卒而吾先有以處之語其大要不過詭而禮之使敵志寢驕而已志意寢驕則

務遠畧忽近慮士卒疲弊而畜產耗亡取死之道也天子於此興問罪之師誰敢屈強頡頑作氣勢如曩時邪漢唐所以安邊境其大計不出乎此臣竊惟道君太上皇帝臨御天下二十六年承祖宗積累之厚天下承平無事咸順指令大臣於此時不能思艱難致勤苦務柔聲婉顏以狐媚上聖此漢唐計策不復聞故金人得以乘中國之釁也夫敵國乘邊鄙之釁豈自古帝王之時無其事耶守禦之方羈縻之義征討誅伐之法簡編具

存宜縉紳大夫平昔所稔聞而厭道之奈何朝廷大臣
遇前日侵軼之變園視共計率不得其要領上皇出狩
宗廟震驚此皆失於不素練之罪也陛下此舉特以驕
敵人窺伺之志紆畿甸攻劫之危至於經畧施為發自天
衷非愚賤所得而臆度而旬日之際道路所傳臣竊惑
之臣聞陛下自金人之來既賁以金帛又許以歲幣今
且遣使割地以賂之夫金帛歲幣已不足惜奈何割祖
宗地以賂遺敵國乎夫割地以賂敵國雖漢唐之陋猶

不忍為孰謂陛下神聖英武而肯為此且中國與外鄰
議和不聞於三代而特盛於漢漢之文帝唐之太宗所
以待匈奴突厥者勤至備厚以歲幣則不失於傷財以
和親則不恤於損威然終不肯以尺寸之地輕予之者
二帝之意豈不曰土地人民國之根本不可輕於授人
乎臣不知今日割地之謀誰為陛下籌之也臣草茅賤
士無由預朝廷末議事之利害皆不得而詳不識陛下
今日所割之地其三關耶臣聞昔周世宗下三關瀛漠

皆異代事敵人不得以為辭又況自祖宗以來二百餘年塞鴈門增塘水治城隍藉民兵所以為之限制者甚備今一割之是失限制也不識陛下今割之地其四鎮耶臣聞太原中山其地嚴重可以扼敵咽喉自祖宗以來精兵重卒悉屯駐於此今若割之是失形勢也夫以限制形勢之地遺敵人其不猶倒持太阿授人以鐔乎然陛下必毅然為之而不顧者臣知其意矣豈非憚於用兵邪臣聞兵雖凶器雖危事然而自古神聖之君

所以立卓絕之迹者未嘗不由於用兵向者金人之來
起於意表陛下以其乘我不虞又諸道兵未會不戰宜
矣以其近於禁城宗廟社稷不可不憂不戰宜矣今敵
兵既歸師老械弊又其來也必大聚數國之師捲甲而
來其鋒難犯然烏合而易散既磨之以歲月安知不自
相背叛耶陛下宜於此時馳一介之命諭諸鎮之兵因
其交地之際啟發釁端建掃風除以破其衆將見勦敵
之徒駭奔而瓦解矣必欲守區區之信臣竊為不取也

且陛下亦知割地有三不便乎今既割地以與金人則中都迫於北邊陛下必不免遷都矣方今洛陽長安近於敵國不可都江左西蜀偏方下國不可都就令

關一字

日強敵熾盛國勢為弱用事之臣計無所出不過勸陛下都襄鄧州夷漫百里其東漢與鳳林為

關兩字

南菊潭

環居而流屬於漢西有上洛重山之險北有自崖連路昔人號為形勢之地沃野之墟疑為可都矣然昔唐高祖遣宇文士及按行秦王力諫以為不足用至昭宗時

朱朴上議以為建都之極疏入不報豈非有所不便故邪況京師自祖宗以來繕治非一日宮闕神麗局務府藏里閉市肆極侈而豐借使陸下一徙都必且鑑前弊惜民力因陋就寡為一切因循之制將何以貽厥孫謀昭示四方邪臣以為一不便者此也今既割地與金人則敵人歲驕華夏日蹙臣恐強敵驚擾邊氓不止今日陛下何不以往事而驗之昔唐寶應二年吐谷渾党項領兵二十萬來畧武功留於京師凡十五日大和三年

南蠻衆掩劫戎雋二州陷之止於西都者十日當此時
天子務為姑息以紓一時急不發兵以窮討使牧馬撻
牛之隸有輕中國心自此以來揚塵鳴鏑突我疆場曾
無寧歲臣嘗讀書至此雖憤外國不靖然亦未嘗不恨
中國有以誘之也今吐蕃南蠻畧我郊甸解鞍緩帶至
於旬日目悅燕趙之色口厭甘美之味文綺佳絢又皆
如意夫歆羨甚則敵國之心生敵國之心生則侵盜之
本也又況強敵已習知吾山川要害也臣謂今不怖金

人以兵則背脅癰疽之患成殆恐其來不已唐室之患
且復見於今日此臣以為二不便者此也今議者但以慶厯
之初仁宗與敵通好自後契丹不敢擁兵窺中原填守
可以遏邊萌之禍且示大信於邊人臣謂渭水之盟杜
如晦實敗之而平原之盟李晟亦不肯信已而可汗就
質普替背叛夫如晦晟非曉術數者也然而遇事若燭
照而數計者誠以敵情翻覆不情故不信之也臣謂北
遼所以不敗慶厯之盟者特以仁宗之初有以結其心

耳夫本朝自仁宗以來朝廷方舉羣策以收太平之功四海所環無一夫舉兵者當此契丹何由而侵擾邊陲邪況祖宗故事奉之如驕子不敢一觸其意彼雖强悍何以啟其釁向使天祚不失道人馬猶盛強遷延寢息以至於今日覩前朝政事之因革知中國士馬之豐耗臣謂契丹敗仁宗之盟也已在於數年前陛下能保其不空銳抗戈以覘候風雲乎能保其不敘攘以邀丐厚利乎然則盟誓於金人果何有哉此臣所以為三不便

者此也夫去所不便而行所甚利唯聖人能之伏願陛下順天之心發英偉之志因強鄰之逼出湯武之師伺其過河交地之際不固執前盟先發其釁示以必戰天道佑善必克清大憝以為子孫無窮之基凡今縉紳士大夫但揣陛下之意厭於用兵必曰本朝自太上皇以來相臣將臣文恬武嬉習熟治安未嘗練卒蒐騎又廟堂之上卒未有應變之臣是勢未可以戰臣獨以為不然臣聞何代而不生才何才而不資世顧人君所用如

何爾昔藝祖好武功則勇猛之士出而為之兵太宗好
奇謀則計畫之士出而為之慮以今天下之大安知其
無人少須假之將見朝廷之上不獨李綱种師道輩可
稱述也雖然今將相如李綱种師道臣知二臣亦可以
辦一時事何則綱之忠義有餘而可以事君師道之謀
畧有餘而不至誤國又況輔之以吳敏之鍊達耿南仲
之老成將欲建功何有不濟臣多見講和不如用兵之
利也陛下清閒之餘淹貫古今豈不知其利害邪且外

蕃雖與吾國甚不相能然自古以來控御之術不一而足當其悖慢太甚曷嘗不與之戰今日但以石晉為戒不敢與爭鋒不知石晉時天下四分五裂朝廷君昏臣愚德既不足以懷徠而威又不足以制服此耶律德光所以一舉而覆汴都也以陛下春秋鼎盛天資英特而又承祖宗有赫之災圖指揮顧盼行有餘力豈可與區區之列國同所慮乎臣誠不佞雖岷岷一布衣平居常患無似遂取古人書閉門熟讀月延歲累頗識古今治

亂自謂論世事顧賈誼馬周不足多伏惟陛下自即位以來寬大之聲勤儉之政已著聞於天下感激垂涕願盡死力然而區區之愚尚有望於陛下者但願陛下臨時聽政更少濟以英斷明決助成聖德使巍巍之功業上擬商宗周宣臣謂百蠻且不足平况叢爾金而足以軫聖慮也狂瞽不識朝廷忌諱罪當萬死 李邦彥乞致仕臣累乞致仕特蒙聖恩依奏伏念臣奮身孤遠遭際興運寢躋華貫遂冒宰司徒激孤忠不敢少負清議

屬者上皇退託以神器付陛下臣首被寄委而輔翊之
重自誓殫竭身屢瀕死有所不避今諛諛之徒扇惑羣
聽喧競倉卒白黑不分臣之所急存宗社安君上惜生
靈而已何敢為身謀而人詆以為奸緩師講和自金人
犯邊僉令大臣議密圖萬全非徒屈意以受辱而人或
指以為闕一心之精白天實臨之乃至定輸金人直以
釋白著之疑寬括糴之令以賑艱食之急撫循坐甲之
旅以勞城守之師若此之類事涉細微雖思出睿慈而

間陳於前不敢緘默大臣建明惟知有濟豈能家至戶
到人人提耳而諭之哉衆聽未孚鑠金可畏不知引避
何以厭服斯民之心伏望檢會已降聖旨早賜施行奉
手詔太宰李邦彥任政府累年屢形憂國憂民之誼以
至惜名器抑裁冗濫獻納非一朕在東宮時熟聞嘉譽
冊立之際備罄忠誠金人犯闕其所建明惟知利社稷
撫軍民為急務故朕一一施行衆志未能遍諭乃作弗
靖鼓唱流言反與前日異意元惡之人忽生怨憤實駭

予聽已依所乞宮祠播告中外咸信勿疑

三朝北盟會編卷三十六